

**IZVJEŠTAJ**  
**O RADU ODBORA ZA ROME PRI VIJEĆU MINISTARA BOSNE I**  
**HERCEGOVINE ZA MANDATNI PERIOD MART 2017. – DECEMBAR 2017.**  
**GODINE**

Sarajevo, april 2018. godina

---

## 1. UVOD

Odbor za Rome pri Vijeću ministara Bosne i Hercegovine osnovan je s ciljem poboljšanja zaštite romske manjine u BiH. Odbor za Rome je savjetodavno i koordinirajuće tijelo Vijeća ministara BiH i kao takav postoji od 2002. godine.

Prvi saziv Odbora za Rome pri Vijeću ministara Bosne i Hercegovine imenovan je na osnovu zaključka Vijeća Ministara BiH sa 70-te sjednice održane 13.6.2002. godine.

Drugi saziv imenovan je Odlukom o imenovanju Odbora za Rome pri Vijeću ministara Bosne i Hercegovine na 27 sjednici Vijeća Ministara BiH, održanoj u novembru 2007. godine („Službeni glasnik BiH”, br. 99/07) na mandat od četiri godine.

Treći saziv je imenovalo Vijeće ministara BiH je na 20 sjednici održanoj 18.9.2012. godine donoseći tom prilikom i Odluku o formiranju Odbora za Rome pri Vijeću ministara BiH i Odluku o imenovanju članova Odbora („ Službeni glasnik BiH“, broj: 85/12) od 25.10.2012. godine. Odlukama su, pored ostalog, definisane nadležnosti ovog tijela.

Četvrti saziv Odbora za Rome pri Vijeću ministara BiH je na 93. sjednici održanoj 08.03.2017. godine Vijeće ministara BiH imenovalo usvajanjem Odluke o imenovanju članova Odbora za Rome pri Vijeću ministara BiH („ Službeni glasnik BiH“, broj: 24/17).

Odbor za Rome se sastoji od 22 člana, 11 predstavnika Roma i 11 predstavnika institucija. Po jednog predstavnika ispred institucija Bosne i Hercegovine predlažu: Ministarstvo za ljudska prava i izbjeglice Bosne i Hercegovine, Ministarstvo finansija i trezora Bosne i Hercegovine, Ministarstvo civilnih poslova Bosne i Hercegovine, Ministarstvo sigurnosti Bosne i Hercegovine, Ministarstvo pravde Bosne i Hercegovine, Direkcija za evropske integracije, Agencija za zapošljavanje Bosne i Hercegovine i Agencija za ravnopravnost polova Bosne i Hercegovine. Također, po jednog predstavnika predlažu vlade Federacije Bosne i Hercegovine, Republike Srpske i Brčko Distrikta Bosne i Hercegovine.

Članove Odbora ispred registrovanih romskih udruženja, po principu jedno udruženje jedan glas, osiguravajući ravnopravnu teritorijalnu zastupljenost predlažu romska udruženja: iz Federacije Bosne i Hercegovine šest članova i to po jedan član ispred uredno registriranih romskih udruženja sa područja Kantona Sarajevo, Zeničko-dobojskog kantona, Unsko-sanskog kantona, Tuzlanskog kantona, Srednjobosanskog kantona i Hercegovačko-neretvanskog kantona, samostalno ili u saradnji sa registriranom krovnom organizacijom; iz Republike Srpske tri člana i to po jedan član ispred uredno registriranih romskih udruženja sa područja regije Banja Luke, Doboja i Bijeljine samostalno ili u saradnji sa registriranom krovnom organizacijom; iz Brčko distrikta Bosne i Hercegovine jednog člana, te ispred Ženske romske mreže jedna članica.

## 2. CILJEVI I ZADACI

Odbor ima nadležnost da raspravlja o svim značajnim pitanjima sadržanim u Strategiji Bosne i Hercegovine za rješavanje problema Roma (“Službeni glasnik BiH”, broj 67/05), (u daljem tekstu: Strategija) te prati provođenje i predlaže aktivnosti u svrhu efikasnije realizacije Dekade inkluzije Roma 2005-2015. godina. Konkretno, Odbor je zadužen za:

- a) sistemsko praćenje provođenja Akcionog plana za rješavanje problema Roma u oblastima zapošljavanja, stambenog zbrinjavanja i zdravstvene zaštite (u daljem tekstu: Akcioni plan) i Revidiranog plana o obrazovnim potrebama Roma u Bosni i Hercegovini;

- b) donosi operativne planove i predlaže mjere za unapređenje provođenja Akcionog plana;
- c) putem svojih predstavnika inicira aktivnosti na osiguranju sredstava u budžetima institucija na nivou Bosne i Hercegovine i entiteta za potrebe realizacije Akcionog plana;
- d) prati utrošak odobrenih sredstava u budžetima institucija Bosne i Hercegovine i institucija entiteta za realizaciju Akcionog planu u sve tri oblasti te dinamiku realizacije istih;
- e) uključuje se u ostvarivanju kontakata sa potencijalnim donatorima i drugih zainteresovanih strana na osiguravanju sredstava za provođenje Akcionog plana;
- f) u cilju donošenja validnih stavova, zaključaka i preporuka, Odbor može, u skladu sa finansijskim mogućnostima, formirati stalne ili povremene komisije i tematsko-stručne grupe, a posebno u okviru implementacije Akcionog plana;
- g) svojim aktom utvrditi će sistem monitoringa realizacije utvrđenih planskih aktivnosti za Rome u Bosni i Hercegovini te pratiti metodologiju utroška donatorskih i budžetskih sredstava namijenjenih za realizaciju Akcionog plana.

### 3. NAČIN RADA

Način rada i odlučivanja Odbora za Rome uređen je Poslovníkom o radu Odbora za Rome pri Vijeću ministara BiH. Odbor razmatra materijale i akte iz djelokruga svoga rada, te donosi zaključke, preporuke i daje mišljenje o pitanjima značajnim za romsku populaciju u Bosni i Hercegovini. Odborom rukovodi predsjednica/predsjednik, predsjedava njegovim sjednicama i predstavlja ga pred organima i institucijama vlasti u BiH i u javnosti.

Zaključke, preporuke i mišljenja o pitanjima koja se raspravljaju na sjednici, Odbor donosi, odnosno usvaja, većinom glasova prisutnih članova/ica Odbora.

Stručnu i tehničku pomoć Odboru pruža Ministarstvo za ljudska prava i izbjeglice Bosne i Hercegovine, a po potrebi i druga tijela, mjerodavna za rješavanje pojedinih pitanja sadržanih u Strategiji i Akcionom planu.

### 4. PREGLED OPERATIVNIH AKTIVNOSTI

U periodu mart 2017. – decembar 2017. godine Odbor za Rome pri Vijeću ministara BiH je održao **pet** sjednica sa konkretnim operativnim aktivnostima.

U izvještajnom periodu Odbor za Rome pri Vijeću ministara BiH se, između ostalih, bavio slijedećim značajnim pitanjima:

- Kreiranje i usvajanje Poslovníka o radu.
- Izrada Akcionog plana Bosne i Hercegovine za rješavanje problema Roma u oblasti zapošljavanja, stambenog zbrinjavanja i zdravstvene zaštite Roma 2017 - 2020.
- Izrada plana aktivnosti Odbora za Rome.
- Iznalaženje sredstava za finansiranje rada Odbora za Rome pri Vijeću ministara BiH.
- Sudjelovanje u radu Komisije za odabir projekata za stambeno zbrinjavanje Roma za ispred Odbora za Rome pri Vijeću ministara BiH.
- Pružanje pomoći Ministarstvu za ljudska prava i izbjeglice BiH tokom pripreme i održavanja Seminara o inkluziji Roma.
- Transparentnost rada Odbora za Rome pri Vijeću ministara BiH.

Pored ovih aktivnosti Odbor za Rome pri Vijeću ministara BiH bavio se i ostalim aktivnostima koje su se ticale različitih inicijativa koje su upućivane ispred romskog nevladinog sektora, te Ministarstva za ljudska prava i izbjeglice BiH, a koje su implementirane u zavisnosti od nadležnosti Odbora za Rome pri Vijeću ministara BiH.

## **5. PREGLED OSTVARENIH REZULTATA**

U navedenom periodu Odbor za Rome pri Vijeću ministara BiH je održao **pet** sjednica sa konkretnim operativnim aktivnostima putem kojih su ostvareni slijedeći rezultati:

- Kreiran je i usvojen Poslovnik o radu Odbora za Rome pri Vijeću ministara BiH.
- Imenovani su romski predstavnici u radne grupe za izradu Akcionog plana 2017 – 2020 (stanovanje, zapošljavanje i zdravstvena zaštita).
- Inicirano je povećanje sredstava za rad Odbora za Rome pri Vijeću ministara BiH u skladu sa očekivanim aktivnostima monitoringa revidiranog Akcionog plana BiH.
- Pružanje pomoći Ministarstvu za ljudska prava i izbjeglice BiH tokom pripreme i održavanja Seminara o inkluziji Roma.
- Sudjelovanje u radu Komisije za zapošljavanje Roma kao ravnopravni članovi.
- Tri člana Odbora za Rome pri Vijeću ministara BiH sudjelovala su u radu užeg Stručnog tima za monitoring Revidiranog akcionog plana za rješavanje problema Roma u oblastima zapošljavanja, stambenog zbrinjavanja i zdravstvene zaštite 2013-2016. Stručni tim je sačinio Izvještaj o provedbi Revidiranog akcionog plana za rješavanje problema Roma u oblastima zapošljavanja, stambenog zbrinjavanja i zdravstvene zaštite 2013-2016 i utroška grant sredstava za 2016 godinu.
- Pokrenuta inicijativa za mapiranje potreba Roma u 2018. godini.
- Održana svečana sjednica povodom Međunarodnog dana Roma.
- Pokrenuta inicijativa da se u narednom periodu pored sredstava za zapošljavanje, stambeno zbrinjavanje i zdravstvenu zaštitu u IPA sredstva uvrste i sredstva za obrazovanje.
- Pokrenuta inicijativa da se ujednači metodologija utroška grant sredstava za zdravstvenu zaštitu.
- Utvrđeni datumi za obilježavanje značajnih datuma.
- Sudjelovanje u raznim edukacijama, radionicama, sastancima i konferencijama.

**Polazeći od naprijed navedenog, predlaže se Vijeću ministara BiH, da nakon razmatranja Izvještaja o radu Odbora za Rome pri Vijeću ministara BiH za period mart 2017. – decembar 2017. godine donese slijedeći:**

### **ZAKLJUČAK**

- 1) Usvaja se Izvještaj o radu Odbora za Rome pri Vijeću ministara Bosne i Hercegovine za period mart 2017. – decembar 2017.godine**